

D. D.

63

DISCURSUS TELEOLOGICI
CIRCA
ATMOSPHERAM
PARS POSTERIOR,

QUAM

CONSENTIENTE AMPL. FACULT. PHILOSOPH.
IN REGIA AD AURAM ACADEMIA,
PUBLICÆ DISQUISITIONI SUBMITTUNT

AUCTOR

**JOHANNES M.
WESTZYNTHIUS,**

PHILOSOPHÆ MAGISTER,


ET

RESPONDENS

CAROLUS ÆIMELÆUS,

OSTROBOTNIENSES,

AD DIEM IX. DECEMBR. A:o MDCCLVIII. 1758
IN AUDITORIO MAJORI, H. A. M. C.




ABOÆ, Impressit DIRECT. & TYPOGR. Reg. Magn. Duc.
Finland, JACOB MERCKELL.

DISCURSUS THEOLOGICI
CIRCA
ATMOSPHERA
HABIT POSTERIOR
G. G.
CONSENTIENS A MEL. FACET LOGOIS
Psalms. CXI; v. 2.
IN REGIA ACADEMIA
LITERIS ET SCIENTIAS
GRADUM MUSI YAHUA

ררושים לכל - הפזיה ס:

Cfr. Syr. XLIII; v. 23-24.



PROOEMIUM.

QUAM ante annum, & quod excurrit, exorsum sumus telam, illam, Bono cum DEO, pertexere jam constituimus. Quamvis enim a qualicunque hoc opere perficiendo aliquantum nos absterere visus sit praesens reipublicæ litterariæ gustus, illa tantum in physicis desiderans, quæ Chymicorum & Mathematicorum principiis superstructa, horumque rigore demonstrata, ad sublimiorem illam in hac scientia theoriam sunt referenda; nec tamen defuere rationes, quæ ut manum huic labori admovere mus persuaderunt. Scilicet videtur ipsa scientia naturalis, utut elegans & sublimis, in se considerata, non alii esse usui, quam ut mentem sciendi cupidum satiet atque delectet. Facta autem theoriae physicæ vel ad Oeconomiam vel ad sanctiorem disciplinam applicatione, verus isque insignis ejus usus demum apparer. Accedit & illud, obrui ferre nos scriptorum pure physicorum multitudine; dum e contrario illa, quæ ad Teleologiam spectant, rariora sint, & ipsa philosophandi methodus tele-

A logica

logica pluribus forte minus innoteſcat. Nos præterea, ut in indole, ita imprimis in nexu rerum natura-
lium mutuo, finibusque ſcrutandis, atque DEO
ex operibus suis cognoscendo, magnam experti-
fumus voluptatem. Nec ideo temperare nobis po-
tuimus, quo minus teleologicas has circa meteora
cognitiones qualescumque, ut continuationem differen-
tiationis nostræ pro gradu editæ, publici juris fa-
ciamus. Receptum ſequi ſtudebimus ordinem;
& quos priori hujus dissertationis parti fontes ſup-
peditafſe indicavimus. Viros Celeberrimos, illis &
heic pleraque grata referrimus. Num vero digne-
an fecus tantos ſecuti ſimus Ductores, benevolo
Lectoris judicio relinquimus.

§. I.

Communis & quotidiana quemvis docet expe-
rientia, dari *Meteora*, h. e. corpora, quæ in
atmosphæra tenentur ſuspensa, & cum variis phæ-
nomenis ſub conſpectum noſtrum cadunt, eaque
tam aquosa, quam ignita & lucentia. Juxta ve-
ro patet non eſſe hæc corpora aëris propria, mi-
nime vero iſum aëra. Observamus enim quod
jam orientur jam iterum pereant; & ſuppetunt in
ſcriptis Physicorum recentiorum experimenta &
rationes perplurimæ, quæ oſtendunt aërem eſſe
corpus plane diverſum ab iis, quæ in illo hoſpi-
tantur corpusculis heterogeneis. (*) Terra itaque
debet atmosphæra hæc ſua meteora. E terra illa
ascen-

(*) Vid. MUSSCHENB, Elem. Ph. cap. 36. aliosque.

ascendunt, & in terram post aliquod temporis spatium iterum delabuntur. Vocantur autem exigua illa corpuscula, quæ e terra sursum elevantur, quæque aëri innatant & materiam præbent meteoris, Effluvia, sive vapores & exhalationes. Illi aqueis & humidis constant particulis; hæ vero contra. Novit quilibet, physices non ignarus, in nulla fere tanta inter Philosophos occurrere sententiarum divortia, tot diversas opiniones, atque circa declarandum vaporum & exhalationum ascensum. (a) Fatemur nostram in hac quaestione decidenda imbecillitatem, cui sumini Physici huc usque non fuisse pares. Forte & universalis effluviorum omnium caussa dari nequit; sed quemadmodum corpora diversæ sunt indolis; ita diversa quoque opus esse videtur caussa ad efficiendum effluviorum ab iis ascensum. Quamvis vero impervium nobis adhuc sit mirificum hoc naturæ opus; insigne tamen existit sapientiæ divinæ specimen, & dignissimum quod mente attenta & venerabunda diligenter scrutemur. Præterquam enim quod ipsissima vaporum & exhalationum elevatio multiplici nobis sit usui, ejusque consideratio veram atmosphæræ ideam nos doceat; est illa quoque origo omnium, quæ e meteoris in nos redundant, bonorum. Ignorantibus itaque sic ipsam effluviorum caussam, suf-

A 2 ficiet

(a) Collegit præcipuas circa hanc rem hypotheses, & novam ipse addidit CHR. GOTTL. KRATZENSTEIN, in tractatu, quem A. 1744. Academiæ Burdegalensi exhibuit, quique præmium inde reportavit.

sciet experimentis & observationibus evidentissimis noise, omnia, vel saltim pleraque corpora terrestria sua in atmosphäram mittere effluvia, ea-que vel plura vel pauciora, vel continuo vel certis tantum temporibus. Erit hoc jam, per palmaria corporum genera eundo, paucis ostendendum. Apparebit autem miram quandam & opinione forte maiorem in atmophæra nostra hospitari particularum heterogenearum congeriem.

§. II.

Aqua repletum esse aërem, ostendit, inter alia, experimentum *Cel.* BOERHAAVE in hanc rem. Sumfit enim ille salis tartari summo igne exsiccati uncias binas & unam drachmam. Hunc salem aëri exposuit, & deprehendit illum intra triduum una uncia & tribus drachmis factum esse ponderosiorum. Immo dum bilanci Docimastarum appendit salem modo dictum, observavit omni temporis momento aliquod ponderis augmentum minutatim eidem *accedisse*; & quando diu in aëre retinebatur hic sal, tandem in liquorem fluidum, pinquem, spissum, tenaciorem & sale prius adhibito fere triplo ponderosiorum fuisse solutum. (3) Tantam vero emittit aqua vaporum multitudinem, ut, juxta observationes *Celeb.* MUSSCHENBROEK, in loco umbroso posita, & libero fruens aëre, intra anni spatium 29. dig. rhen. deperdat. (y) Cogita autem jam quanta sit in superficie

(3) *Elem. Chem.* Tom. I. de aëre (y) *Elem. Phys.* Cap. 38. §. 1185.

cie telluris aquarum copia! Quum vero notum præterea sit, esse aquam vel fontanam, vel fluvialem, vel putealem, vel paludosam, vel marinam, veldeniique pluvialem, hasque diversas aquarum species diversa in multis gaudere indole; patet non unius generis esse vapores ex aquis ascendentes. Sed non tantum ex ipsis aquis in superficie terræ reperiundis vapores aquei elevantur; verum etiam ex corporibus quibuscunque humidis, quæ, dum per aliquod temporis spatium aëre fruuntur, suam amittunt humiditatem. Præterea quæ e corporibus vivis in auram exsurgere effluvia mox videbimus, ea quoq[ue] maximam partem aqueis constare particulis, ex observationibus naturæ scrutatorum satis apparet.

Quod *Corpora Animalium*, per innumeros, ex quibus contexta sunt, tubulos, ut & mediante anhelitu, insignem emitant effluviorum copiam, id multiplici constat experientia. Ostendit hoc de hominibus accurato scrutinio SANCTORIUS A SANCTORIO in sua *Medicina Statica*; Ostendant quoque observationes variæ vulgares, quæque in cūjusvis oculis cadere possunt. Sic videmus sudorem e poris corporum erumpere; videmus hominem, dum calente corpore in frigida loca subterranea descendit, mox atmophæra cingi; videamus speculum aut metallum politum, tactu hominis, seu ad os naresve applicatum, obnubilari, cetera. De animalibus reliquis idem hoc patet, & ex analogia, & sudore illorum halitibusque varie odoratis, & denique exemplo canum, qui animalia,

malia, exhalatis illorum odore perceptis, summa sagacitate distinguunt & prosequuntur. Observavit autem nuper laudatus SANCTORIUS, effluvia e corpore humano illam servare quantitatis rationem ad alimenta, cibum puta & potum, ut, si ex his octo librarum pondus uno die ingeratur, perspirabilis materia quinque libris circiter soleat esse æqualis, (d) adeoque & mole & pondere evacuata sensibilia longe superare; unde de ceterorum animalium exhalatis judicari potest. Perpendamus vero jam, quam immensa sit multitudo hominum & que ac brutorum animantium, quovis tempore in terris degentium! Certe mira hinc exsurgit effluviorum e Regno animali copia. Quum vero variæ indolis sint corpora humana, pro ratione alimentorum, sanitatis, ætatis aliarumque rerum, & reliquorum animalium hodienum jam fere 5000, species sint cognitæ (e); potest inde haud vana conjectura colligi summa horum effluviorum diversitas. Ad hæc observatum quoque est, excrementa e corporibus animalium perpetuo secreta, & que ac urinam in aërem subito dissipari. (f) Ut vero hæc pro ratione animalium diversa sunt & insigni dantur copia, ita quæ aër ex his accipit nec pauca sunt nec eiusdem indolis. Quemadmodum autem sic, dum in vivis sunt, corpora animalium, semper aliquid suarum partium in aërem exonerant, adeoque quasi perpetuæ morti sunt obnoxia; ita ne-

(d) *Statice Medicina Sect. I. Aph. VI.* (e) LINNÆI *Syst. Nat.* ed. nov, (f) BOERHAAVE *Elem. Chem.* Tom. I, de aëre,

que post fata huic naturæ legi desinunt esse subiecta. Quæ per prælia existit hominum bestiarumque strages horrenda, innumeris fere cadaveribus campos implere novimus. Hæc vero, quum insepulta jacent, putredine dissoluta volatilia redduntur, & sponte sic tandem in aëre sepeliuntur. De Balænis constat, quod in littora maris ejectæ & mortuæ, paucis diebus aërem circumiacentium regionum pestiferis particulis inquinent. Sed non de illis tantum cadaveribus hoc constat quæ libero utuntur aëre; verum est idem compertum quoque de iis, quæ sub terra conduntur. His addendum etiam, exigua insectorum ovula, immo ipsa quoque animacula minima in auras tolli, ibique teneri suspensa; unde cum pluvia eadem delabi observarunt nonnulli. (n) Et hæc de animalibus monuisse sufficiat.

Neque vero pauciora sunt, quæ e *Vegetabilibus* in atmospærā dispersuntur effluvia. Comprobant hoc observationes plurimæ vulgares. Sic odorum copiam in silvis, pratis atque hortis sentimus insignem; & qui ex odoratis stirpibus per aëra in oceanum diffunduntur halitus, novimus nautis ita inservire, ut continentem, quam nondum vident, illorum ope conjicere possint. Imo vero tanta est quorundam florū odoratorum vis, ut eorum exhalationes vasis exactissime clausis vix coerceri & conser-

(n) BOERHAAVE I. c. WINCKLER. *Instit. Math. phys.* §. 1686. MUSSCHENB. *Phys.* §. 1180.

conservari possint. (9) Optime vero, & summa cum prudentia institutis experimentis, transpirationem plantarum ad liquidum perduxit *Celeb.* STEPH. HALES in opere incomparabili, quod *Staticam Vegetabilium* complectitur. Idem hic soler-tissimus Experimentator in ipsam quoque quantitatem materiæ, quam egerit transpirans flora, inquisivit, & deprehendit inter alia coronæ solis tres pedes cum dimidio altæ transpirationem maximam calidissimis anni diebus libræ uni & quatvorde-cim unciis fuisse æqualem. (1) Unde proportionalis aliorum vegetabilium transpiratio conjici potest. Transpirant autem ex vegetabilibus tam spiritus eorum nativi, quam qui per fermenta-tionem & ignem producuntur; tam olea eorum quam sales & ipsa quoque terra, quæ stirpibus firmitatem conciliat. (2) Nec vivæ tantum & crescentes plantæ in aëre corpusculis ditando oc-cupantur, verum & illæ, quæ destructioni jam sunt subiectæ & quasi in pereundo constitutæ. Pollen præterea & semina vegetabilium, ipsæque plantæ minutissimæ in aërem rapiuntur. (3) Cogi-tanti autem insignem, quæ in superficie telluris quo-vis tempore floret plantarum copiam, Facile ap-parebit, opinione forte majorem esse multitudinem effluviorum, quæ hujus regni incolæ in atmosphærā emittunt. Ut vero circiter 9000. diversæ plantarum species

(9) WINCKLER. l. c. (1) STEPH. HALES *Statice der Gewächse*, pap. I. seqq. (2) BOERHAAVE l. c. (3) MUSSCHENBR. *Phys.* §. 1180.

species hucusque a Botanicis sunt detectæ (*); ita summa esse oportet horum quoque effluviorum diversitas.

Sed erit quoque paucis videndum, num etiam duriora illa corpora, quæ *Mineralium* nomine veniunt, huic naturæ legi naturæ Auctor subjecerit. Affirmant hoc, saltim de plerisque, experimenta *Physicorum*. De mobili & volatili illa glarea nihil commemorabo, quæ quibusdam in locis, imp�mis vero in Ægypto, Æthiopia, Arabia & Lybia, in aërem rapitur, ibique per varias directiones circumvehitur. Terram, saltim mediante igne, in atmosphèram elevari, vel exinde constat, quod fuligo in altissimi camini fastigio ex fumo lecta, in destillatione chemica terram sinceram notabili copia præbeat. (μ) Lapidès & Metalla, paucissimis exceptis, vel frictione aliquem emitunt odorem, vel igni admota, tota aut aliqua sui parte redundunt volatilia, vel denique libero aëris contactu in flores, ferruginem, aruginem &c. convertuntur. Circa fodinas, sæpe cœlo sereno ex improviso fumi apparent, qui flammam facis extinguunt. Observantur quoque variæ exhalationes e locis quibusdam ascendentes, in quibus nonnulla mineralium genera latent. De Sulphuribus nullum hoc in puncto restat dubium. Affirmat de salibus quoque *Cel. BOERHAAVE*, quod, utut sint fixissimi, mediante aqua

B

&

(*) LINNÆI Spec. Plant, (μ) BOERHAAVE & WINCKLER locis cit,

& calore volatilia reddantur. (v) Quanta vero in hoc quoque naturæ regno sit corporum multitudo atque diversitas, ignorare potest nemo, qui vel tantillum Fossilium cognitione est imbutus. Patet ergo & multa & diversissima esse, quæ mineralibus debet aër atmosphæricus.

Ignis in atmosphæra præsentiam arguunt tam meteora quævis ignea, quam observationes, quæ thermometrorum & speculorum causticorum ope capi solent. Hæc itaque res prolixa quadam probatione non eget.

De omnibus denique *Effluviis* in genere observandum, quod, quemadmodum non omnis omnia fert tellus, & quædam præterea loca ab hominibus sunt occupata, qui animalia ibidem alunt, terram vertunt, agros stercorant, artesque varias exercent, quædam autem ex adverso penitus jacent inculta & inhabitata; ita fieri non potest, quin diversi singulis e locis ascendant vapores & exhalationes. Et est tempestatibus quoque aliqua diversitatis effluviorum causa attribuenda. Hæ enim efficiunt, ut non eadem semper sit ipsius superficie terræ indoles & dispositio. Præterea terræ motus, montium ignem vomentium atque urbium incendia, ceteraque ejusmodi, nova caussari possunt effluvia. Quæ vero sic singulis locis sunt propria, ea ope ventuum in alias regiones cito disperguntur.

§. III.

DUm sic breviter evicimus, pleraque corpora terre-

(v) cfr. ROB. BOYLE de *atmosph. corp. consit.* item BOERH. I. c. & WINCKLER instit. math. phys. §. 1687.

terrestria sua in atmosphäram mittere effuvia, erit
jam aliquid teleologici his adjungendum; Et primo
quidem videndum, qualis menti nostræ impressa esse
debeat atmosphæræ idea, quique ejus in corpus nostrum,
sunt effectus; dein vero usus ipsius effluviorum ascensus
& meteororum inde nascentium, paucis inspiciendi.

In. §. præc. allata qui considerat, habebit atmo-
sphäram chaos quoddam verum & universale, in
quo omnis ferme generis corpuscula mire inter se
commixta vagantur. Est illa laboratorium chemi-
cum consummatissimum, in quo innumera & di-
versissima corpora concurrunt & mirificos istos pro-
ducunt effectus, qui e singulorum viribus & indole
dependent. Aquæ, ignis, animalium, vegetabilium &
fossilium particulas subtilissimas in atmosphæra hæ-
rere observavimus. Has vero diversissimæ esse in-
dolis, & alias saluti hominum prodesse, alias vero
eidem quam maxime nocere, multiplici constat ex-
perientia. Notum quoque est effuvia nonnulla, quæ
in le plane sunt innocua, dum combinantur cum a-
liis, maxime fieri venenosa; quædam autem ex ad-
verso eorum, quæ revera nociva sunt per combi-
nationem indolem suam adeo commutare, ut salu-
ti nostræ evadant maxime proficia. (2) Quum ve-
ro in priori hujus Dissertationis parte ostensum sit,
(quod & communis unumquemque attendentem do-
cet experientia) nos quovis vitæ nostræ momento
B 2 quasi

(2) Vid. rei exempla apud BERNH. NIEUVENT YT in
Recht. Gebrauch der Weltbeobachtungen Cap. 19. & BOERH.
El. Ch. T. II. p. m. 425.

quasi vesci aëre hoc atmosphærico, & hic præterea, pro diversa, qua singulis temporibus gaudet contingente, in ipsam quoque externam corporis nostri partem per vasa cutis absorbentia continuo agat; hinc dubio omnino caret, quin ab eodem hoc fluido aëreo, iisque, quæ illud in se continet corpusculis heterogeneis, salus nostra, immo ipsa quoque vita & mors maximam partem pendeant. (o) Si igitur alibi certe heic omnipotens & sapientissima Divini Numinis manus, summa cum veneratione, est agnoscenda. Huic enim illam debemus dispositionem, quod, quamvis fluido tot nocivis corpusculis inquinato circumdemur, eoque perpetuo fruamur, nunquam tamen, (si paucos & specialissimos quosdam casus exceperis) ejus causa in vita periculum incurramus. Neque minus sapientiae Divinae vestigium est illud, quod sensus nostri ita sint constituti, ut minima horum in aëre obvolitantium corpusculorum pars videri, & gustu aut olfactu percipi possit. Quod si enim omnia, quæ in aëre deprehenduntur, nostros afficerent sensus, non posset non perpetua apud nos excitari naufea, nosque vitam viveremus longe miserrimam, infelicissimam.

§. IV.

ERUNT JAM UTILITATES, quæ immediate ex ipsis effluviis eorumque ascensi in vitam humanam pronuntiant, paucis a nobis attingendæ.

Quod

(o) Vide hanc rem physico-medice expositam in elegantissima Dissertatione de aëre eiusque in corpus humanum effectis, Ups. 1734.

Quod igitur attinet *lo Perspirationem corporis humanis*, fatentur medici saniores, quod ex impedito hoc naturæ operere, maxima morborum imprimis acutorum exoriatur cohors; contendunt iidem, quod accurata hujus theoria, tanquam fundamento firmissimo ipsa scientia medica nitatur, & quod plerique morbi, absque habita ratione perspirationis, & nisi medicus eandem, si immixta fuerit, prout corporis ægroti ratio id requirit, augere nosceret, curari plane nequeant. Et arguit perspirationis utilitatem, immo summam necessitatem ipsa quoque corporis nostri structura & mechanice, id quod penitiores ejusdem scrutatores satis superque ostendunt, nobis autem in præsentiarum exponere datum non est. Patet eadem hæc necessitas etiam exinde, quod quidquid superflui atque noncum cibo atque potu ingerimus, id omne persensibiles excretiones egeri nequeat; hac itaque via ad reliqua dispellenda opus est. (π) Quod vero sic de perspirationis in corpore humano usu constat, id & in reliqua animalia quadrare, vel ex analogia colligi potest.

Ait neque minor est ille usus, quem ex perspirationis lege 2:do experitur *Regnum Vegetabile*. Etenim qui in terræ gremio præparatur & in vascula vegetabilium ascendit succus nutricius, quin ille multa vel superflua vel nocua secum ferat, de eo nullum est dubium. Patet vero hæc, si intra

(π) Vid. de his SANCTORII med. stat. sect. I. item P. NOGUEZ introductio ad eandem, N. ROSEN Compend. anatom. pag. 226, seqq.

corpus vegetabilis subsisterent, vel ipsam plantam morbo aut morte esse affectura, vel ad usus destinatos, h. e. hominum brutorumque alimentum, eandem redditura minus idoneam, quod plantæ in humidis locis crescentes suo satis commonstrant exemplo. Ad hæc autem incommoda avertenda perspirationem optime conducere observamus. Ejus enim ope superfluæ illæ & nocivæ particulæ vegetabilibus separantur & in auram disperguntur. Et conspicitur circa hanc rem sapientissima quædam dispositio in eo, quod, quemadmedium transpiratio unica in plantis est evacuationis & excretionis via, ita eadem quoque est abundantissima, eique promovendæ ingentem his corporibus datam cernimus superficiem. (p) Huic igitur naturæ legi haud minimam partem illa debetur prærogativa, quod nobis reliquisque animalibus vegetabilia supperant salubria, & quibus absque salutis vitæque nostræ periculo frui possumus.

3:to Qui in globo terraquo conspicitur aquarum velut per circulos motus perpetuus, ille cum omnibus, quæ in tellurem inde promanant utilitatibus, fere totis vaporibus eorumque ascensui debetur. Fluvii suas ex fontibus nascuntur aquas, quas cursu quodam non interrupto in mare iterum exonerant. Aquæ in oceanum sic collectæ evaportant, & in nova regione semeat exhibent videndas. Atmosphæra autem non diu alienis his corporibus scatet & ditatur. Reddit eadem, utpote quæ ad tem-

tempus tantum sibi sunt concredita, terræ, unde illa accepit. Fit hoc tam mediante pluvia, (de qua infra agendum) quam ipsorum vaporum simplici de- scensu & ad montes facta dissolutione , quo ipso fontibus quoque originem præbent iisque & excitandis & conservandis palmarie inserviunt aquosa hæc ef- fluvia.

4:to Neque minimi faciendum est illud vaporum ministerium, quod fontes sub terra latitantes & a- lioquin vix reperiundos indigitent, quodque nos ho- rum auxilio illos optime possimus expescari. Scilicet u- beriora illa, quæ ex hujusmodi locis ascendunt effluvia, saltim matutino tempore, dum aër frigidior est, sub conspectum nostrum cadunt, & fontium præsentiam certo sic arguunt atque commonstrant.

5:to Vehementem solis calorem estate diminunt vapores, adeoque & hoc capite insigni nobis sunt u- sui. Ostendit hoc minuta speculorum causticorum vis, quam experti sunt Philosophi, dum sol per a- liquot dies nimio flagravit æstu. (σ) Nec intellectu difficilis est ratio hujus phænomeni. Quæ enim du- rante calore vehementi in atmosphærā elevatur va- porum & exhalationum multitudo, efficit, ut haud exigua radiorum solarium pars reflectatur, illisque tel- lurem attingere non liceat. Præterea & illud heic in censum venire monet Cel. WOLFIUS, quod, quemadmodum corpus frigidum, dum aliud corpus calidum con- tingit, de hujus calore aliquid sibi vindicat, & insuper constat,

(σ) Memoires de l' Acad. Roy. des sciences, A.D. 1705.
p. m. 50.

constat, aquam plus caloris recipere quam aërem; ita nec fieri potest, quin ob effluvia hæc aquosa aliquam sui caloris jacturam patiatur aëris. Et hinc etiam illud evenire contendit, quod ædificia tempestibus calidis refrigerentur, dum pavimenta eorum aquâ frigidâ adsperguntur, eaque in vapores soluta dissipatur. (†)

6:to Norunt quilibet, experientia ab ipsis incunabulis continuata, quanti haud raro in vita humana intersit, corpora humida exsiccare. Dantur hujus rei exempla in Oeconomicis quamplurima & ita cuivis obvia, ut aliquod eorum proferre opus plane non sit. 'Hoc ipsum vero perfici omnino non posset, nisi hæc de vaporum elevatione lex in natura obtineret. Etenim humiditatem suam tunc amittunt corpora, quando particulae aquosæ illis antea adhaerentes in auram abeunt & dissipantur. Atque hæ sunt palmariae effluviorum eorumque ascensus utilitates. Alias brevitatis caussa jam præterimus.

§. V.

Sequitur jam, ut varia illa, quæ ex his effluviis signuntur *Meteora*, jejuna huic disquisitioni teologicæ subjiciantur. Licet autem nobis in hac materie eo esse brevioribus, quo certius sit, plerasque meteororum utilitates, per quotidie habitam experientiam, ipsi quoque vulgo non esse incognitas. Paucissimis ergo nosmet hinc expediamus.

Inter *Meteora Aquea* referri solent: nebula, nubes,

(†) Vid. CHR. WOLFI, Bern. Ged. von abs. der nat. dinge, Cap. IV,

bes, pluvia, nix, grando, ros & pruina. *Nebula*, sive descendens fuerit sive ascendens, quam permeat atmosphæræ regionem, non potest non e particulis, quibus scatet, heterogeneis purificare. Hinc purus & respirationi animalium maxime idoneus post dissipatam nebulam deprehenditur aër. Quas ipsis effluviis, in minuendo calore, atque fontibus & fluviis sustinendis, supra adjudicavimus partes, illæ & huic meteoro omnino competitunt. *Nubes*, illæ cœlorum fenestræ, consummatissima & ditissima existunt aquarum promtuaria, quas per totum terrarum orbem ita distribuunt, ut nullibi necessaria illarum copia desideretur. Pluviam enim demittunt & in altiora montium cacumina a ventibus compressæ atque fractæ, una cum nebula vaporibusque invisibilibus, fontium & fluviorum perennitati prospiciunt. In promovendo caloris nimium intensi decremento plus valent nubes quam reliqua omnia, quæ aër continet. Scilicet efficiunt hæ idem non ea tantum ratione, atque de nebula & subtilioribus effluviis audivimus, verum constat, easdem ipsum quoque solem haud raro ita obumbrare, ut, qui sub dio sua peragunt negotia, jucunde refrigerentur, viresque suas ex flagrantia solis debilitatas mox refici animadvertant, quam primum nubibus obducitur cœlum. Sed observatur etiam in hoc meteoro proprietas quædam allatae huic plane contrarius. Videlicet augent calorem & frigoris vehementiæ haud levi existunt obstaculo. Fit enim nonnunquam, ut dum certum ad solem tenent situm nubes, quidam radiorum

solarium ab illis in terram reflectantur, adeoque il-
 lorum multitudo & effectus, h. e. calor, in locis,
 quæ reflexi hi radii attingunt, augeantur. Et no-
 tum est, quod, experientia longa edocti, agricultæ
 nostri periculum metuant segetibus suis, dum se-
 renæ ac lucidæ noctes ingruunt; dum vero nubi-
 bus obductum esse horizontem intelligunt, non
 item. Hinc instar vestimentorum terræ censendæ
 sunt nubes, quibus contra nimium calorem & fri-
 gus muniuntur tellus corporaque terrestria. *Plu-*
via, quam ad aquationem terræ imprimis destina-
 vit naturæ Auctor, fontes, flumina, lacus, & quæ
 aliæ sunt currentes aut stagnantes aquæ, conser-
 vat, quid per evaporationem amittunt, reddit,
 utque nunquam penitus exsiccentur, efficit. Ipsam
 terram præterea humectat, plantisque alendis red-
 dit maxime idoneam. Aërem quoque lavat plu-
 via delabens, & ex heterogeneis nostræque saluti
 nocivis particulis purgat. *Ros* deficientis pluviae
 vices supplet, immo videtur huic interdum præ-
 rendus. Plantas ab æstu solis, qui interdiu illis
 incubuit, enervatas & fere mortuas, ita hic re-
 ficit, grataque adeo refrigeratione condonat, ut
 novo vigore, coloribusque nativis & elegantissimis
 rursum superbientia conspiciantur hæc camporum
 ornamenta. Imprimis rori mensis Maji magnam
 inesse virtutem jam dudum est compertum. Est
 vero circa rorem singularis quedam & notatu o-
 mnino dignissima a Summo Numine facta dispo-
 sitio in eo, quod in istis locis, quæ vel nimium
 vehementi solis calore gravantur, vel pluvia nun-
 quam

quam aut saltim rarissime fruuntur, hæc incommoda, hi defectus, insigni roris quavis nocte decidui copia, dimoveantur & resarciantur. *Nix*, præter utilitates, quas cum pluvia habet communes, luci augendæ & intendendæ inservit. Radices quoque vegetabilium ovaque insectorum munit ac custodit, quæ alioquin & absque hoc tegumento, frigus hiemale perferre & sustinere neutiquam possent. Huic etiam illam debemus prærogativam, quod durante hieme, itinera per septentrionales has regiones commodissime institui queant. Ast dantur quoque nonnulla huc pertinentia meteora ex quibus aliquid detrimenti est metuendum. *Grando*, imprimis cuius globuli majori gaudent & mole & gravitate, segetibus aliisque plantis vim infert maximam; *Fenestras* & reliquas res fragiles, quæ illi sunt expositæ, lacerat, immo ipsos quoque homines & bruta animantia vel fauciatur vel in summum vitæ periculum inducit. *Pruina* fruges deperdit & totas sæpe regiones necessario vitæ alimento privat. Quid? quod illa quoque meteora, quæ alioquin maximo sunt usui, interdum ad terram devastandam adhibeat natura. Sic *pluviam*, dum in excessu decidit & sub imbris aut nimbi nomine venire solet, non minori quam grandinem Regno vegetabili esse perniciei, norunt omnes ruricolæ. Quando largiora & diuturniora aquarum agmina effunduntur, tantæ inde existunt inundationes, ut ad prata, agros, hortosque fertilissimos desolandos sufficient, & homines brutaque variis premant incommodis. *Ros* etiam interdum

nocivi quid continet, quo plantas in primis cereales altioresque alias inquinat & deperdit.

De Meteororum Ignitorum & Lucentium ut caussis & indole ita finibus quoque non multum nobis innotescit. *Fulgur*, *Fulmen* & *Tonitru*, illa maxime horrenda naturæ phænomena, refrigerando atque purgando aëri, quantum percipimus, inserviunt, illumque respirationi & vegetationi redundat maxime idoneum. Alioquin comminantis iræ Divinæ quasi imagines hæc existunt & merito censi possunt. Violenti autem, quos hæc meteora edunt effectus, quique ab animalibus, plantis, ædificiis, ceterisque cum insigni percipiuntur danno, nemo facile ignorat.

Venti, qui sensibili certi cujusdam atmosphæræ tractus agitatione & motu absolvuntur, multiplicem præstant usum terræ ejusque incolis omnibus. Aërem perpetuo ascendentibus effluviis prægnantem esse novimus; si igitur semper quiesceret, utique in suffocationis periculum, pestem & fatale quoddam exitium omne vivum induceret. *Venti* autem hæc effluvia vel dissipant, vel ita compriment, ut aucta sic illorum gravitate in terram iterum delabi cogantur. Nec aërem modo, verum ipsam quoque terræ superficiem & domicilia nostra sordibus & inquinamentis liberant. Aëris temperiem custodiunt nimiumque & calorem & frigus arcent. Fulmina, aliasque graves tempestates, materiam illorum in herba quasi suffocando, impediunt venti. Divitias atmosphæræ, meteora puta, in primis vero nubes, per totum orbem dispergunt; alioquin

quin enim in eadem loca sua demitteret munera; unde eadem accepera, atmosphæra. Plurimi etiam & utilissimis machinis mouendis, atque navigationi excercenda inservit idem hic aeris motus. Quod autem inconstantium ventorum nonnulli, violenti putat, subitanei & ex alto ruentes, maxima quoque in plurimis nobis adferant damna, id neminem fugere potest. (v)

Neminem hæc in meteoris obvia mala physica offendere speramus, nec quemquam argumenta inde petere bonitati DEI inimica. Præterquam enim, quod hæc mala consideranda sunt, ut promerita introduci mali moralis poenæ, paucissima quoque sunt, de quibus constat, illa inter veri nominis mala esse referenda. Notum est, quod exilis admodum in hac physices parte sit nostra cognitio, quodque parum omnino in nexum, seriem & fines phænomenorum sic hucusque inquisitum. Nescimus quorsum tendant speciosa illa mala, quibusque viribus ad eadem resarcienda ipsam naturam naturæ Auctor instruxerit. Videntur etiam haud pauca ejus esse indolis, ut adhibita prudentia & diligentia humana, averti possint; quæ itaque ingenio nostro acuendo quam maxime inserviunt. Nec sapientia DEI inconveniens esse deprehendimus, quædam minora admittere mala, quo majora sic efficiat bona, eaque hominibus longe plus profutura, quam nocent ipsa mala. Imperfectionem quoque partis perfectioni totius haud raro conducere, demonstrant Metaphysici. (φ)

§. V.

ATQUE HÆC PAUCISSIMA CIRCA METEOROLOGIAM ADDUXISSE SUSCIPIAT. Videamus jam quinam ex hoc discursu penes nos excitandi sunt pietatis stimuli. Innumera & diversissima in ære hærere observavimus effluvia, eaque haud raro multum nocivi in se continere, nos vero nihilominus inquinato

C 3

hoc

(v) Conferatur circa hanc rem elegantissima dissertatio de utilitate Ventorum, Aboæ 1751. (φ) Conf. WOLFI BERLI. ged. von abs. der nat. d' nge, aliosque Auctores Teleologicos passim.

hoc fluido absque salutis dispendio frui. Legem, quæ de vaporum & exhalationum ascensu in natura obtinet, maxi-
mi esse momenti, & indoli tam animalium & vegetabilium
quam reliquarum rerum optime convenire, vidimus. Ipsa
meteora tantos præstare usus ostendimus, ut, si abessent,
miserrima in his terris foret rerum omnium conditio. Quum
igitur juxta fixas adeo & continuas Læges etiam heic agat
natura; quum opera ejus svavi quodam nexus sic inter se
cohærent, ut manus quasi sibi invicem porrigan, & uni-
ta vi in communem finem vergant; quumque præterea ipsæ
hæ, quas observamus leges, ipse hic, qui nobis obvius
est nexus, adeo non ulla gaudeant necessitate, ut plane ali-
ter existere possint: Quid & de fortuito quem sibi finxe-
ront mundi ortu & de aternitate ejus judicandum sit, dif-
ficulter intelligi nequit. Sincera itaque & pia mente omnia
atheistarum deliria summaque dementia documenta detestemur!
Quum præter res naturales tam ad existentiam quam vires
illis ab initio prædictis perpetuo conservari, illarumque
effectus sapientissimis DEI finibus optime subordinari anim-
advertisimus; patet naturam esse planissimum providentiæ Divi-
pæ speculum. Abeant itaque *Deistæ* atque *Fatalista*, & pu-
deat illos stultissimæ, quam fovent, opinionis! Quum deni-
que summa illa Divini Numinis attributa, bonitas, sapien-
tia & potentia ubique in natura patescant; sint hæc ipsa
nobis incitamento validissimo, quo ad supremum
hoc Numen pie amandum atque colendum
commoveamur!

S. D. G.



Corrigenda.

Lege: pag. I. lin. 5. absterrete; p. 2. l. 7. cogitationes; l. 12. referi-
mus; p. 3. l. 4. ascendunt; l. 12. summi; p. 4. l. 8. atmosphæra; l. 20.
accessisse; l. 22. pingvem; p. 5. l. 25. atmosphæra; p. 6. l. 14. Regno.